

四庫全書

集部

欽定四庫全書

集部

文莊集卷

四至
六

詳校官監察御史_臣李陽樞

檢討_臣何思鈞覆勘

謄錄貢生_臣吳士英

謄錄監生_臣孫汝明

謄錄監生_臣雷琳

欽定四庫全書

文莊集卷四

宋 夏竦 撰

表

賀老人星表

臣某言伏覩司天臺奏老人星見於丙位者虛皇輔德
垂象著明式瞻有爛之輝允叶無疆之壽照臨所及慶
抃惟深中賀伏惟皇帝陛下恭已臨人齋居訪道參侔
開闔包舉藝文體虞舜之蒸蒸紹宣於先憲法周文之

翼翼對越於景靈授仙籙於禁門接真游於祕殿擁靈
休而益茂布仁澤以惟寬函夏同文天人交際以是上
穹凝命南極呈祥應春律以騰輝直天弧而絢彩寔審
算延洪之應及庶民康阜之休臣等幸遇昌期叨塵近
職奉義和之奏式表於殊祥考甘石之經彌增於率舞
願書青簡永播鴻休懇至欣榮倍百倫等

賀昭應宮成表

臣某言良辰協吉恭館告成凡在照臨率同慶抃中賀

伏惟尊位皇帝陛下寅威體道慈儉時中順乾則以推
仁奉先猷而追孝至誠以臨億兆潔志以奉靈祇由是
景命昭通真圖申錫授太元之神策式集於皇儀侔曲
密之仙都肇營於祕宇度鴻龐之久制鳩瓌異之偉材
揆日出以辨方候定中而經始尊三清之正位載嚴真
祖之庭範二后之睟儀爰設百靈之象瑩欽崇之精意
極神麗之宏規工有技而咸程物有珍而必效式屬仲
冬之序聿成大壯之功灑宸翰於銀題繁禧沓至列榮

班於金祀鴻慶方隆臣限守官曹恭刊帝籙顧莫陪於
著位但俯積於歡心抃蹈之誠賈異倫等

聖駕離京次日上第一表

臣某等言伏以奉祠方澤將奠於黃琮案御清畿初張
於翠蓋望徐鑒之效駕歷吉日以布和中謝恭惟尊位
皇帝陛下膺千載之期御元氣之辯總集瑞命已儀炳
於靈篇咸秩無文遂躬修於禋祀矧省方之伊始諒儲
祉以無疆

第二表

臣某等言伏以百神率職方祀於地祇五輅鳴鸞式遵於時邁中謝恭惟皇帝陛下紹休聖緒茂建民中蘭葉獻圖已勒封於岱岳黃雲覆鼎更昭薦於汾雕竊惟三辰之祈俯經千里之甸賴一人之有慶固萬祥之畢臻

第三表

臣某等言今月二十六日入內內侍省內侍高品譚元吉至伏蒙聖慈特傳宣撫問者翠蓋時邁將必祀於汾

陰使者星馳遽側聆於天語俯炳丹青之旨如親咫尺之顏中謝伏念臣某等幸遇會昌久塵祿位屬省方於睢壤俾留鎮於都畿雖比屋之民富庶而既教揭法之地桴鼓而不鳴豈茲禱昧之能治此浩穰之俗縱虔遵於訓典庸莫副於倚毗恭惟皇帝陛下文致時雍德膺天慶靜則合宮衢室垂衣裳而嚮明動則溫洛滎河授龜龍之薦瑞已垂鴻於陽祉遂昭事於柔祇蓋致孝於兩儀亦祈民之百穀垂聖心於覆露軫臣下之勤勞臣

等未效涓塵特邀眷待王言所被與華袞而同獲睿旨
初聞共陽春而交感誓罄匪躬之節上酬不報之恩

第四表

臣某等言伏以肅若舊典肇禋明神祀方澤之皇祇望
屬車於馳道臣某等恭惟尊位皇帝陛下重光御極上
聖膺圖方展儀於河汾蓋推功於天地風后陪乘羽衛
由是纂嚴蒼靈奉塗福祿以之攸降

第五表

臣某等言伏以禋祀高雎星言法駕將展省方之盛禮
式符漢后之羣心中謝恭惟尊位皇帝陛下廣覆堯仁
升聞舜德答三靈之蕃祉宣二聖之重光伸孝享於郊
丘奠皇祇於冀壤既集禮神之館佇聞寶鼎之歌王度
之貞式如金而如玉天道下濟固為龍以為光臣等迹
遠陪鑒心馳就列帝車爰止莫參禹會之期日馭將施
但效封人之祝

第六表

臣某等言伏以五壇巡祭昭事於汾睢萬國駿奔同趨
於禹會方恪居於官次莫親奉於天顏中謝恭惟尊位
皇帝陛下誕受丕圖欽承寶命致美黻冕而九廟儲休
潔粢牲粢而百神薦祉帝德廣運咸蘓後之人皇澤
如春載洽懷生之類

第七表

臣某等言伏以國家振舉闕文講求縟禮順蒲人之望
幸嚴汾水之親祠中謝恭惟尊位皇帝陛下建極臨民

握圖聽政方鳴鸞於軍道將奠玉於嘉壇諒洋溢於謳歌允飛騰於英茂惟天為大如日之升

第八表

臣某等言恭以國家順河汾之篚后奠牲帛於柔祇諸侯陳執玉之儀多士結望雲之懇中謝恭惟尊位皇帝陛下明德恤祀展儀省方歷覽於圖書之淵齋紘於靜寘之館大車弭節方嚴穆穆之容祥風繞壇將降穰穰之福臣某等恪居官次馳戀皇軒除地給薪莫詣侍祠

之列拖紳鳴珮深懷拱極之心

第九表

臣某等言得行在進奏官狀報伏承今月某日皇帝躬
祀汾陰禮畢者無文咸秩表上聖之寅恭明德惟馨見
至誠之昭薦崇龐鴻之大業舉曠絕之盛儀降及飛沈
率同歡忭中謝臣某等聞乾知太始而坤作成物混元
之大化也父事於天而母事於地聖王之至孝也洪惟
厚載職彼資生配剛健於運行兆陰靈之正位成周之

莫大澤由八變而出地祇炎漢之祠素汾升五壇而集
神貺若時能事屬在昌期恭惟尊位皇帝陛下睿覽穆
清至仁淵靜挺克明之睿德紹累洽之鴻基帝頌依仁
奉若於天道唐堯稽古於變其時雍聲明文物之相宣
雍容揄揚而咸若六府既正九叙惟歌向以穹昊儲休
圖書錫瑞奉符展采既增喬岳之封勒崇垂鴻聿大丕
天之律已推功於上帝肅昭事於柔祇蘭臺時英稽四
巡而獻頌蒲津黎老願萬乘而啟行丹詔往俞近臣先

置聖心虔輦而戒事靈物紛紛而降祥若影響之相隨
明天人之交際及清畿時邁法駕星陳華蓋承辰見惠
風之和暢黼帷藻野屬春日之載陽洎升壇薦鬯之辰
受嘉氣喬雲之應百靈效祉豈惟三燭之神光萬祥畢
臻不獨登歌於寶鼎懿鑠度越於千古休烈烜赫於四
方豈鑿井耕田而不知固跂行喙息而遂性巍巍蕩蕩
諒無得而名穆穆皇皇知大事在祀臣等親逢旦暮仰
頌形容鄴宮會朝莫陪於法從明堂上壽即奉於宸嚴

第十表

臣某等言伏以汾曲裡嚴已畢奠琮之禮方明朝會式
陳班瑞之儀就堯日以馳誠祈舜聰而逖聽中謝恭惟
尊位皇帝陛下體乾立極抱一居尊齊律度於萬殊寶
慈儉於六合聲教所暨盈溢於天區德澤滂沱汪洋於
海外故得薦膺景貺紛委嘉符岱岳增封答三靈之蕃
祉漢雎親祀收百代之闕文擁社稷之神休顯帝王之
能事今者嘉壇襲吉燠燎升煙九壤蒸黎仰太陽之委

照上都耆艾俟鳴蹕以傾心皇猷已冠於古今令譽更
孚於夷夏伏冀皇帝陛下早迴仙仗歸格神京治庶彙
之由庚俾普天之同慶臣等保釐京邑夙夜公家盡瘁
之心敢忘於丹臆拱辰之列佇望於清光

第十一表

臣某等言伏以禮崇盛鬯既頒賜於汾祠孝享園陵適
親臨於洛邑矧王畿之接畛迎制蹕以傾心中謝恭惟
尊位皇帝陛下懷柔百神同風三代聖德加乎海內文

教溢於天區道人采詩已供於夜誦諸侯執玉率慶於
會朝惟象魏之在瞻諒中外之禔福

第十二表

臣某等言伏以齋禮神之館已升燎於高雎登頌祇之
堂方廻輿於近甸望軒遊而俯邇瞻堯日以歡心中謝
恭惟尊位皇帝陛下精潔明裡講求逸禮素汾奠玉已
昭魚舞之祥溫洛受圖更顯鳳銜之瑞矧休應之紛委
屬詔蹕以言旋式宴清宮洽皇恩於愷樂受釐宣室凝

帝道於穆清

第十三表

臣某等言伏以鳴玉鑒於汾水已殫報本之誠蔭華蓋於洛都載展奉先之孝仰鴻儀之備舉肅禁衛以言旋中謝恭惟尊位皇帝陛下敷祐四方交修百祀為人祈穀驗膏澤於豐年采詩觀風知民耕於帝力日馭方迴於黃道塗歌先洽於清畿

第十四表

臣某等言伏以禮盛親祠膺三靈之睠命慶成歸格順
萬國之歡心仰日馭以非遙望翠華而竊忭中謝恭惟
尊位皇帝陛下恢崇鴻業宣暢皇猷尚質貴誠已肇裡
於泰折布德行惠復統政於明堂授時之令惟新及物
之恩彌廣

第十五表

臣某等言伏以方鼎升庖神既歆於嘉享徐鑒弭馭詔
以示於先期瞻有穆之睟容祝無疆之景福中謝恭惟

尊位皇帝陛下丕承聖緒光闡帝圖唐堯稽古而聰明
高陽潔誠而祭祀察事地之禮嘉生由是均和修頌祇
之書豐澤以之大賚式臻神貺允集天休臣等目注迴
輿心馳迎蹕望六龍之御莫及於前驅率百辟之班佇
朝於近甸

第十六表

臣某等言今月二十五日龍圖閣待制查道至伏蒙聖
慈以車駕還都特賜詔書撫問者伏以方澤奠琮禮成

於嚴祀皇輿復路詔示於先期辱聖睠之便蕃走歡聲
於遐邇中謝恭惟尊位皇帝陛下重光御極執象臨民
懷生被廣育之仁制禮盡大中之道濟河之日堯承刻
玉之文祀汾之初漢膺寶鼎之瑞既協坤靈之薦祉俄
瞻日馭以言旋臣叨荷宸衷俾司留務無涓塵之微效
有葵藿之至誠薦沐鴻慈俯頒芝檢捧螭泉之綠字賁
大帝之寶文聞效駕於和鸞固踴躍之無極藏賜書於
巾篋實榮耀以難偕

第十七表

臣某等言伏以瑞氣宵凝既顯坤靈之薦祉歡聲雷動
式當詔蹕之言旋几屬照臨悉同歡忭中謝恭惟尊位
皇帝陛下帝德廣運人文化成順萬物由庚之宜考太
一省方之義撫空桑之瑟已降於地祇清甸師之畿即
回於雲罕俯茲青陸更擁鴻休

賀五色雲見表

臣言伏審今月二十日聖駕至真源縣有五色雲見者

徐鑒夙駕總駟於名區卿霑晨敷流暉於紫宙繁禧允
集率舞咸同竊以雲物凝祥簡編攸載帝鴻紀事肇采
於官名虞舜協華賡歌於瑞命蓋太和之積粹疇至德
以呈符仰屬昌期愈彰丕應恭惟尊位皇帝陛下叅侔
邃古率育黎蒸紹隆累洽之基懋建太寧之化寶圖候
日丕顯於靈猷真祖在天茂昭於道蔭式舉朝修之禮
彌臻顧諟之祥當恭館之齋心有非煙之效祉紛綸綯
采散赤水之餘霞煥衍騰文凝吉雲之曉露聳羣瞻而

慶異垂信史以彌芳昭萬壽之遐齡廸三清之景祐某
限居

原缺
二字

宜從鸞旗仰聽殊尤唯增抃蹈

賀奉祀太清宫禮畢表

臣某言伏覩詔書今月某日奉祀太清宫禮畢者茂典
慶成繁禧允集照臨所暨抃蹈咸同中賀伏惟皇帝陛
下寅畏時中惠和逮下丕承帝籙紹舉於皇儀欽奉真
游躬聞於道誨爰狗黎元之請虔趨仁聖之祠達精意
於蕭鄉薦鴻名於寶冊誕受聿懷之福允濟雍熙茂昭

善貸之仁永宣至治

賀尊皇太后表

臣某言伏奉某月日勅尊太上皇后為皇太后恩覃日下歡動天中中賀伏以皇太后坤德合符陰靈表慶化光宮職道贊國風伏惟皇帝陛下仁聖宅心文明恭已尊承孝理嚴奉慈顏獻寶綬於內朝宣玉冊於中禁彰明后順知陛下就養之勤表正母儀見陛下歸安之盛萬國所繫四方是刑台臣之懇願既申品物之歡心斯

洽

乾元節賀表

臣某言伏以鴻明代照累洽於昌辰景貺游彰親逢於誕節書文所混歡抃攸同中賀恭以皇帝陛下淵德日躋聖猷天縱靈承道蔭祇率貽謀啟箴誦之廣塗游文章之奧府驅除微孽分判於忠邪遴東材臣將明於憲度總周文之九德兼虞舜之大功絕俗來同縣區作乂後天獻祝咸慶於茲辰拂石迎祥永隆於大業臣頃持

荷橐久事龍潛貧賤難工孤寒寡援百城剖竹徒傾就
日之心萬壽稱觴莫預在庭之列精虔禱願倍百常鈞

又

臣某言伏以燕謀啟慶神告昌期虹渚流光天垂景貺
當真聖挺生之旦乃炎靈累盛之朝罄率土以傾心效
華封而獻壽臣誠歡誠抃頓首頓首伏惟尊位皇帝陛下
躬膺駿命寅御寶圖纂隆三后之基冠映百王之表
屬正陽之紀月廼甲觀之誕辰慶叶千齡歡同萬寓臣

攀鱗最舊補袞非工方守鑰於留都阻稱觴於秘殿帝
暉有赫遙傾就日之瞻宸算無疆仰極後天之祝

賀立皇后表

臣某言伏覩進奏院狀報本月十八日立皇后准勅十
一月三日行冊禮者禴組撰儀穀圭展禮統宸闡而有
典佐景命以無疆凡在懷生不勝大慶中賀臣聞易贊
坤厚所以配乾元詩詠關雎所以始王化塗山登而翼
夏媯汭降而興虞蓋資內助之勤式盡外刑之美恭惟

體天法道仁明孝德皇帝陛下眇觀振古為憲太寧追孝祖宗務嚴於裸獻觀象日月用廣於照臨考墜驚之美祥卜覩天之異表金螭玉檢載嚴徽冊之容瑤爵褱衣將助太宮之薦臣久違表著遠守封圻委珮在廷莫陪於鰲抃凝雲入戶但仰於輦儀欣戴之誠倍萬倫等

賀皇子慶誕表

臣某言伏審今月五日皇子慶誕者吹銅御和郊媒毓粹受震主罷宗廟增威凡預含生罔不載躍中賀伏惟

皇帝陛下德澤滲漉神施丹青軫上仁於九圍襲太和
於萬有時應積累之祚仰寤熾昌之符瑞啟前星祥開
一日華封祝聖協多子之善辭太如續徽騰百男之嘉
頌臣方司謫戍遠駐邊屯阻陪辨色之趨上慶重輝之
美

賀皇太子授官表

臣某言進奏院狀報伏審皇子授守太尉忠正軍節度
等使封壽國公者宸闈集祉天序飛榮書軌所臻人祇

交慶中賀伏以帝出萬物蒼震效乎長男龍見大辰前
星表乎世子蓋知有國之重莫越元良之尊允屬熙辰
宜崇鉅典伏以皇帝陛下睿徽百度為憲太寧忠厚以
布淳風吉蠲以修明祀萬國被澤溥洽於至和三聖在
天日監於盛治以是璿源濬發真蔭誕章義御吉祥天
枝毓粹洪惟初載之美丕顯徇齊之姿仰尊宗廟之威
頗緩景風之拜是稽禮制肇啟國藩襲惟帝之舊封承
曼壽之遐祚瑞發文象歡震華戎凡在有生率同大賚

臣出司邊警方謹秋防阻詣太微之朝仰慶少陽之德
望雲載躍倍萬欣榮

留司官吏賀表

臣某等言伏覩進奏院狀報十二月三日冊婉容張氏
為貴妃者揚命外朝講儀中禁寢進天妃之貴順承宸
極之尊盛典惟行羣生共慶臣等誠歡誠抃頓首頓首
恭惟尊位皇帝陛下穆清居位濬哲在躬舜治無為禹
功不伐既格太寧之化允資內輔之賢申勅柄臣奉將

冊禮分采章於六服冠品列於九嬪彌增軒曜之光寶
亞坤儀之位用宣陰教永助帝猷臣等幸預通班獲逢
熙運仰宮闈之多慶傾海寓以同歡

文莊集卷四

欽定四庫全書

文莊集卷五

宋 夏竦 撰

謝加承奉郎表

臣某言今月某日進奏院遞到勅牒一道伏蒙聖恩加臣承奉郎仍放朝謝者告瑞公朝獲三篇之秘牒覃恩庶品降五色之乾文寵耀踰涯驚惶失次中謝臣聞魏開宸厯階號爰分唐據帝國散官攸設所以旁昭等列下懋勲庸在我良時鬱爲華貫恭惟尊位皇帝陛下元

功無際靈貺薦臻馭萬國以器名勵羣臣以祿位苟非
久歷年所克荷官常則命不虛行恩無妄受如臣者學
慚多士官忝屬丞素微橫草之功獲被如春之澤敢不
盟心白水誓節青松請纓當効於終童求試願希於賈
傳庶傾塵露上答蒼穹

謝直集賢院表

臣某言蒙恩以本官直集賢院者北門禁省給青簡以
試言東觀直廬降紫泥而命職莫逾假人之器

案此語
疑用左

傳惟器與名不可以假人之意但與莫道二字文義乖
隔考宋文鑑器作刺又與假人二字文義不貫疑當作
侯人之刺用詩曹風意以自謙則與莫道二字
字文義相屬矣但無別本可証姑仍其舊 式彰遇主

之榮中謝竊以承明設待詔之官實漢朝之芳潤麗正
啓修書之院乃唐氏之英華濬圖書之淵敞龍鳳之署
自非弓裘繼世章句名家通授義畧如之靈篇閑書笏
珥彤之故事則何以繼成康之嘉頌考宣武之懿文陪
法從於甘泉奉宸游於屬玉况當聖日允屬簡求如臣
者學不傳經文非近史青青子佩雖見刺於勞心翹翹

錯薪亦濫期於刈楚筮仕勝衣之歲薦名象日之畿方
博帶以觀光遽墨衰而泐牒尋遇國家誕敷尺詔增廣
六科方棲枳以徒勞遂上封而自薦始交文於鼇苑旋
試可於鼎司亟趨文石之墀遂忝延英之問擊轅度曲
敢望於九成縈帶分墉俄登於百雉陞象河之屬吏佐
分虎之方州爰受代於瓜時遂歸朝於幄坐典陳陳之
粟閱山委之丘區從九九之車總絲枻之案牘暨還衡
睢壤舍爵太宮既諧引籍於金閨將佐于蕃於熊軾又

慮沉迷薄領廢墜簡編負公朝振舉之科幸聖主詳延
之意遂殺青而奏技果出綽以推恩禁林俾試於雕蟲
書殿遽令其抱槧閱上帝之冊府目眩星辰登道家之
蓬山足踐雲氣奉長者之餘論與先生而並行分直石
渠地接嚴更之宇縱觀金匱門連著作之廷載惟螻螳
之軀莫報乾坤之賜恭惟尊位皇帝陛下事寢廟以至
孝奉靈祇而克誠沅鴻藻於絕垠鑠景炎於往號以文
明而行健體柔克以居高縱觀唐漢之大猷備舉黃虞

之故實睿藻和而六同韻天章麗而五佐飛恢崇務廣
於斯文獎擢不遺於小道遂使至孤之士獲塵非次之
恩東陵遽擬於西山羔裘遂登于狐腋歌衛風而合雅
鬻齊紫而雜良誠當潔節於素絲敢不盟心於白水益
三思而出話彌九復以窮經永冰淵惕勵之心奉日月
照臨之鑒庶追素餐之謗仰酬明主之知媿懼所深兢
惶不已

謝賜昭應宮判官兼賜章服表

臣某言伏蒙聖慈賜臣勅牒一道官告一通授臣本官
充玉清昭應宮判官兼面賜章服者欽承恩渥俯積兢
榮中謝伏念臣幸會亨期最爲孤進自先臣之盡節始
泐牒以效官折腰初佐於縣庭承乏遽參於州幕偶六
科之選士趨三府以試言擿埴索塗誤攀於僞軌以蠲
測海謬對於聖題纔叨上第之榮遂忝屬丞之命佐憑
熊於丹嶠屬撫玉於雲封亟遷秩於芸局旋侍祠於汾
壤由是升華仙室引籍於朝闈較藝禁林振纓於學館

踐宣猷之近省備太史之後陳紬百氏之格言緝兩朝
之大典兼總金刀之務俄塵諫諍之司顧蹇蹇以無聞
但容容而自愧矧屬舊臣居守特預於賓從元輔朝脩
爰司於奏記念踐敬而無取荷東擢以尤深書言動於
宸墀總勾稽於會府夙宵一志雖堅金石之誠尸素十
年莫著涓塵之效此者伏遇尊位皇帝陛下虔尊道興
祇若靈心奉三境之真文紹九重之聖緒體密都之神
麗擴恭館之穆清地有寶以皆呈山有材而必効聿舉

慶成之典載嚴置使之規皆眷命于公台式尊崇於憲
度仍分衆職肅奉攸司載惟倅事之臣允極當朝之選
尤謂博求鴻碩登用雋良豈意顓蒙誤膺推擇授之綸
綍寵以金章鏘瑤佩於絳臺冀希於仙品奉藻書于紫
館絕異於慈榮重念臣本以孤平素無伎藝微近親可
以仰給乏先疇可以取資唯賴鴻私妄階榮路爰從樂
育以跂甄陞未有秋毫不由帝力天高地厚固報德以
無階恩重命輕誓竭心而有素敢不服勤官次祗事真

庭永堅寅畏之心上副欽崇之旨

謝知制誥表

臣某言伏奉制命特授臣尚書禮部員外郎知制誥依舊玉清昭應宮判官同修起居注同管勾景靈宮公事散官勲賜如故者紫微祕掖獲書命之司丹屏儀曹叨奏疏之任仍兼載筆尚贊殊庭恩獎特隆心顏無措中謝竊惟二帝常典以雅興成章兩漢訓辭以深厚爲體上則記言于國史次則視草于臺郎洎當塗應期建通

事之職至天監在御有知誥之名命令攸資選授殊重
李唐之盛良士繼登奉四禁于鎖闥總六曹于畫省在
夫掌畫尤聳殊榮況屬昌辰彌彰異舉自非豐規茂識
瓌質明姿則何以藻潤帝謨暉華時望如臣者文非近
雅材不逮人幸對昌期最爲單緒而自諫科賜問學館
升華抱慙宣猷類芳塵于往躅汗青史閣頌鴻烈于先
朝由是分校錢刀佐司筦籥遂叨書于言動仍遷掌于
勾稽日就月將僅成于注記未出墨入纔辨于綱條伏

遇國家觀象密都奉符恭館適慶成而置使俄倅事以
叨榮矧屬壽域歡康颺輿降格廣太微之憲度昭事于
九皇集灞會之威神欽崇于五鎮遽膺明命並預攸司
夫何瑣微有此榮慶敢不齋心紫府竭慮清場仰體精
衷肅祈靈鑒然而顓愚難變震慄倍增未嘗苟悅于人
亦無微忤于物重念臣藝文至陋資地素寒衡門本乏
于官榮先父止供于傳遽在臣所得揣分已多雖白首
以不遷亦甘心而知幸豈謂尊位皇帝陛下仁深昭遠

道極包荒濬發鴻慈主張孤進特預傳于密旨俾先示
于試期仍親擇于近題用曲全于惜學拔之羣萃置在
清華玷郎選而其優伏王言而斯重暨兼修于衆職實
茂聳于榮觀特達之恩固無階而可報懇激之意惟刻
骨以自銘誓當更効涓埃倍懷霜雪秦官漢表博考于
舊儀周誥湯盤鋪觀于大要或奉真之暫暇即溫故以
求新庶逃彼已之譏上答非常之遇

謝授戶部員外郎表

臣某官伏蒙聖恩特授臣尚書戶部員外郎依前玉清
昭應宮判官知制誥同修起居注同管勾景靈宮會靈
觀公事散官勲賜如故者蘭臺約史本無塵霧之勞畫
省分曹遽進版圖之職顧增華於清禁實交懌於營魂
中謝伏念臣胄緒單平藝文淺陋而自父兄早世族屬
無依弱冠自公但冀寒宗之有後遺孤聚首止期寸祿
以代耕豈意逢辰躋始望翠繡華組早齒於貴遊秘
掖殊庭繼塵於清選既容容而昧進故碌碌以無聞乃

者伏遇國家頌次先猷總裁大法獲編聯於注記或是
正於疑譌最處後陳莫効覃研之力尤爲未至曾微歲
月之勤詎期金匱之成書將預龍綸之第賞況臣近叨
殊渥蓋未踰時猶夕惕之不遑何寵靈之敢覲豈謂雲
雷播澤靡間於寒暑日月分暉遂通於幽隙載循非次
實媿徽榮此蓋尊位皇帝陛下昭式孝思俯矜微物察
其遇主本不因人中九重特達之知開四海孤寒之望
靡拘常牒務表鴻慈敢不更勵疲頑仰承丹米心非木

石固舉族以銜恩命等蜂蟻奈無階而報國唯誓夙宵
之志仰醕素育之仁

謝授禮部郎中諸宮觀充職表

臣某言伏蒙聖恩特授臣尚書禮部郎中依前知制誥
同修起居注充玉清昭應宮判官同管勾景靈宮會靈
觀公事散官勲賜如故者恭館慶成方均于大賚嚴宸
第賞猥及於無功聞命已還揣躬增惕中謝伏念臣材
質駑下門緒寒微金馬之中乏葭莩之薄援赤墀之右

無蟠木之先容不謂逢辰誤塵清選殊庭倖事已聳於
榮觀禁掖代言更踰於始望每勵省循之志深懷止足
之風此者伏遇國家挺尊祖之鴻徽載崇於祕宇奉奠
方之明德並進於嚴祠既成大壯之規載洽斯干之詠
爰曲覃於茂典特進秩于中儀揆景儻工既非於已力
偷榮昧寵實媿於朝倫此蓋皇帝陛下樂育羣材主張
公道憐其遇主本不由人曲持特達之恩用慰單平之
望天高地厚欲報德以何階藥苦冰寒但誓心而有素

周章感懼倍百常鈞

洪州到任謝上表

臣某言伏奉勅命就差知洪州軍州事已於今月十三日到任禮上訖者孤宦沉迷累更於郡組隆恩橫貸復序於藩條惟忖已還心顏靡措中謝伏念臣天資淺薄門緒悴寒幸會先朝誤階榮次虔遵孝治冒觸寬科戚既自詒孽將安道仰賴天宥尚剖左符繼典五城連更七祀眩瞽滯疾園養自安孤苦餘生零丁滋甚徒索累

鍾之奉絕無橫草之勤竊自憂惟合從澄汰豈謂伏遇
尊位皇帝陛下哀矜庶品保宥羣生躬奮乾剛肅持威
柄恩豐漏目貲餘黨於銅山禮重齋心登正人於玉鉉
剷除弊杻崇起化樞事無善而不旌材有長而畢錄而
復勤哀舊物澄洗非辜太和洽於萌生廣照鈞於隙穴
豈意傷摧之末猥叨杖拭之私載錫裝錢就升州寄矧
茲洪井實表重江襟帶七閩咽喉百粵使驛相係軍府
是司地望頗雄祿廩殊厚敢不重蘇肝膽罷怯於虛絃

再整筋骸漸圖於實效永期糜潰少謝惘矜

辭起復知制誥表

臣某言伏奉制命授臣起復知制誥者私門凶咎餘喘
僅存上聖矜嗟隆恩猥及聞命交悸悼心靡圖臣某誠
哀誠懼頓首頓首伏念臣門地素寒父兄早世而自操
觚學舍結綬仕途唯母與臣更相爲命遽遭靡依之痛
何勝罔極之哀而况宅兆未安杯圈如在蒙慈幼之育
凡四十一年報免懷之恩止二十七月豈可遽亡

原本
缺二

字亟襲衣纓自顧餘生彌增鉅痛伏望聖慈念臣執喪日短報國日長許事几筵俾終祥禫永將軀命仰答恩私

謝起復知制誥表

臣某言伏奉制命特授臣起復尚書戶部郎中知制誥散官勲封賜如故者哀紀稱情未報劬勞之德宸慈念舊忽膺圖任之恩祇

原本缺一字

靡從拜受增惕中謝伏念

臣如弦謬直伺兔本愚不知巧宦之方但罄樸忠之節

先皇帝憐其若是愍以至孤俾入事于龍潛實久趨于
鶴禁單平寡援間隙易乘由是出守一麾連更六郡九
年電擊萬里火馳層闕連雲止期于夢到殘骸弔影敢
冀于生還適屬咎積私門悲纏陟屺爰扶旅櫬遠泛重
江四海無家指都畿而歸葬六親聚首顧生計之屢空
毀滅未能饑寒是迫豈謂伏遇尊位皇帝陛下體天育
物愛下延慈記藩邸之舊臣軫穆清之聖慮特頒賻贈
俯恤哀惻方祇奉于几筵且漸營于宅兆冀終喪制式

罄孝思豈謂皇帝陛下再軫宸衷俯矜微物特降奪情之命曲乖牽復之文戴重施以何勝還故棲而增感謹當書心誓節刻骨銘肌

謝皇太后表

臣某言伏受制命特授臣起復尚書戶部郎中知制誥散官勲封賜如故者寢苦聖室方深在疚之哀書贊紫垣遽奉奪情之詔仰膺恩典靡措心顏中謝伏念臣賁緒單平藝文淺陋孤寒寡援唯盡力于公家愚直無謀

但竭忠于臣節果由譴累出守藩條奔走九年既無于
替日艱難六郡敢望于生還爰屬偏親奄終暮齒式遵
治命歸葬近畿繞繚風波偶存于性命零丁賤累共迫
于饑寒命也奈何計將安出豈謂伏遇尊位皇太后陛
下聖謨天縱睿照神資洞察下情勤哀庶物念臣夙懷
忠鯁仰事先朝知臣粗守行藏絕無資計特頒賻布大
濟窮塗方卜葬襄冀終祥禪豈謂皇太后陛下復排羣
議再簡慈衷俾起授于前官仍靡容于固讓枯骨復肉

死灰重燃爲恩甚明舉族難報敢不盟心金石勵志雪
霜上酬覆載之私永誓蜂蛾之命

辭加食邑表

終堂之戚卜吉祭於在辰連土之封荷異章而錫寵拊
哀懷而靡置拜嘉命以不遑臣某誠哀誠懇頓首頓首
伏念臣迹本羈孤器惟隘薄誤被先朝之眷早陪禁闥
之游更領左符粵在外服比丁釁罰俯就喪居幸逢繼
照之期曲沛奪情之命復司言之舊職忝進牘於近庭

仰懿律之惟幾敷邇猷而靡告繼升樞府預贊前籌年
穀既升方及外除之變樹風不止彌懷欲養之悲敢謂
伏蒙尊位皇太后陛下特軫慈襟曲推渥霈因祥事禪
安之始錫米邑陪敦之榮念制爵之匪私矧謝朝之有
典冀獲收於渙汗庶無重於忝踰然念臣猥以芻微甫
參柄任尊夙夜之基命雖昧善謀承日月之末光已驚
榮會矧茲名物之設厥有等數之差苟曲澤之薦沾亦
多言之可畏實祈惟睿終賜保全干冒鴻慈臣無任祈

天厯懇激切之至謹奉表陳謝以聞臣某誠惶誠懇頓
首頓首謹言

潁州到任謝上表

臣某言伏奉勅命差知潁州軍州事已於今月十二日
到任禮上訖親見吏民奉宣溫詔因望京闕乍遠邇願
中謝伏念臣世本孤平業惟文史先臣盡節以忠孝傳
家真廟臨軒以賢良中選涖職數十次效官三十年四
海憲章編研稍備三朝史策頌次繼成雖無可紀之勤

頗勵當官之志而自一陪鈞軸再貳樞廷固欲罄述遠猷極陳時弊不惟事有深隱於衆意之罕同而又職在叅裨終大議之難立但務愛君竭志率職勵精輯理軍防裁處邊奏詳言正色規檢於武臣潛計密謀周旋於兵要恥捷給口吻以揣摩上心恥結託朋游以自爲身計七周年篇三奉裡燔顧每速於人言亦屢移於病告既無顯著之效大妨賢雋之塗賴聖鑒之保全得列城之息偃陪京匪遠庇族頗優此蓋伏遇尊位皇帝陛下

念臣早奉龍姿最爲舊物憐臣逮事先帝本是常材惟
天地之至仁務從善貸記犬馬之前效特出異恩省過
以還感極以泣乍遙旒宸方事米鹽保庇之慈雖君親
之是賴孤危之跡誓寒苦以自彊冀集涓塵少裨海岳
青州到任謝上表

臣某言昨奉勅差知青州充青淄等州軍安撫使已於
今月十四日到任赴上訖中降命書外遷候服循涯已
過銘骨殊深臣某誠感誠忤頓首頓首伏念臣本以孤

生早塵上祿不自揆度強學古人之爲何意遭逢遂蒙
聖主之眷盡忠圖報無意他防勤勞一事以未成讒嫉
萬端而已構蓋朝倫之共棄獨天造以曲全假以清資
付之近郡始再更於年籥遽就改於州麾素稱表海之
雄乃重撫封之寄事權增大職業夥繁此蓋伏遇尊位
皇帝陛下至德兼容大明回照察臣本由直道知臣不
避衆嫌每聞譖毀之辭常加庇護之意矧推異渥復委
要藩臣方知向之所存果非失道死而後已誓不改爲

永堅愚慙之心上答睿明之施

辭刑部尚書表

臣某言今月二十一日三班借職張守珍到州伏蒙聖
慈賜臣勅牒官誥各一道特授臣刑部尚書依舊知青
州軍州事并賜詔書示諭者當官無狀議賞誤加載自
裁循交深震慄臣某中謝伏念臣本惟孤進逮事先
朝分珪組以雖多絕涓塵之可錄昨以東秦舊壤仍歲
阻饑猥奉詔函就分使指既營救之無策徒奔走以爲

勞所賴天意照臨聖謨優假漕陝右之粟西下於洪流
汎淮甸之舟東浮於滄海出良縑於御府禱嘉雨于靈
祠經費已充豐潤斯洽至若賑恤貧窶禁止寇攘靡敢
便宜動皆奏列唯奉行於宸旨用祇率於列城雖歲穀
之遽登每簡書而是畏豈期誤寵猥及無功儻開多幸
之塗恐滋流競之俗重念臣名品已峻齒髮甚踈毗益
無聞滿盈甚懼豈可暫驅使領便欲僥求貪朝廷之功
以爲吏課掠州郡之効上冒主恩何待人言固當自訟

伏望尊位皇帝陛下俯哀舊物深軫上仁終始大恩保全孤跡聽輟出綸之命俾安據蒞之憂如此則賞必及勞有光於國體臣無虛授免瀆於朝經斯實至誠固非文飾言瞻白水可誓丹衷隕越戰兢期于得請

謝授刑部尚書表

臣某言今月二十六日進奏院遞到詔書一道賜臣伏蒙聖慈以臣上表蒙恩授刑部尚書乞輟恩命宜不允者寵章非次成命不回祇受以還震惶無措中謝伏念

臣人品至下天幸何多先皇初置諫科臣獨膺聖選陛下未離宮閣臣首事龍潛自以介拙無徒孤寒多難歷職二十許任效官三十餘年奔走四方周旋二府入朝見嫉固自古以難逃直道而行信安身之不易非先皇始終顧遇難立於危蹤非陛下特達保全豈至於今日報國絕一毫之效竊祿有五鼎之殮敢以無功更當誤賞每露章之至懇終睿旨之靡俞跪啓詔封交流愧汗此蓋伏遇體天法道仁明孝德皇帝陛下識臣面目察

臣肺腑罔恤人言動由宸斷上則極至公之道昭勸於
勤勞下則推求舊之仁敦厚於風化望九重而正遠恨
萬死以莫酬敢不更勵樸忠俯安疲荅勉圖來效少答
大恩

南京到任謝上表

臣某言祇荷寵私伏增感懼中謝竊念臣孤寒多難養
直無謀頃事先朝首依東禁當內閣始開之日識太陽
初出之輝抱繫和鉉皆真皇之密命解衣推食盡陛下

之深恩式屬重熙仰緣前愛猥蒙誤寵擢預近司再貳
樞衡一陪台鼎粗守爲臣之節載傾許國之忠三侍種
燔七周年籥羣情寡合多咎其非才天鑒察微獨憐于
守拙獲均勞逸盡出保全一昨海表薦饑飛蝗肆孽猥
分使指宣布朝恩上賴皇威獲清冠劇道途至遠歎旅
病以無醫歲月屢遷望威顏而莫睹方欲少須涼景虔
拜露章求換郡於京西冀遵途于闕下一對當陽之法
坐少陳東夏之遠圖退就蕃宣永藏頑鄙豈謂伏遇尊

位皇帝陛下俯憐際遇尚記姓名遽錫詔函俾司留府
惟茲劇地實首庶邦佳氣春陵夙比真人之里青雲洛
水聿興王者之都漕引江吳控制淮海使驛係路雖駟
馬之卑迎厨膳闕供顧雙鷄之不腆况臣筋骸疲滿蹤
迹單危懼速多言上孤親選願察守株之拙更寬如地
之容永誓糜捐上醅覆露

文莊集卷五

欽定四庫全書

文莊集卷六

宋夏竦撰

表

辭戶部尚書表

臣某言今月十九日馬遞到府伏蒙聖恩賜臣誥勅各一道特授臣行戶部尚書散官勲封賜食邑如故者私悃再傾寵章誤及俯循涯分罔措心顏臣某中謝伏念臣獲事兩朝僅逾三紀中外更踐微半策以堪書閱閱自

闕絕寸長之可錄幸尹興王之壤矧兼主籥之司地望甚高朝委尤重但以孟諸之澤舊為卑濕之鄉嚮夏載塗方冬未燥年光若是疾勢可虞是以甫及再朞恭布危歎冀更爽塏以避鬱蒸蓋仰戀於清宸望苟延於餘喘豈期天造特改地官載懼鑿墉甚於據疾若乃慶恩均霈久次例遷伏限通規所宜祇授而況臣東秦進秩歲始三周雖水書勞官無一善豈可因求僻左邀取恩榮倡僥倖之風壞廉恥之俗輿情共駭自訟何安伏惟

尊位皇帝陛下盱食九重勵精百度夢卜得於賢佐物
色訪於良臣方精汰於否臧難誤施於爵賞伏望陛下
識臣面目察臣肺腑念臣稍涉藝文粗知廉恥乞却還
於舊職誓永守於別都庶當責實之朝免累及勞之典
天鑒在上公議盈庭儻不由衷必有餘戮實非矯節願
賜允俞

謝授戶部尚書表

臣某言今月六日進奏院遞到詔書一道伏蒙聖慈以

臣上表為授戶部尚書乞且守舊官宜不允者渙汗難收緣言俯諭仰懼再三之瀆實增俯僂之慙中謝伏念臣本以諸生濫登制舉始踰弱冠即玷清流倖事殊廷代言禁掖解衣推食辱先帝之深恩抱槩和鉛首東朝之盛選入奉溫文之德實逢初載之先進銳疾顛寵深多忌一辭雄戟日傾思幄之心六換魚符孰有賜環之請伏遇尊位皇帝陛下虔膺寶命祇擁蘿圖總攬大猷博尋舊物錫飛毫於神筆推奪禮於墨衰遽還復於故棲

驟參陪於庶政纖縑難比對來寵以凌兢垂翅自傷聽
虛弦而隕越曲承大庇得守外藩東夏往綏方搖於寇
竊南都內徙交湊於川涂以婞狠之姿處繁劇之地邇
顏方隔浮議易乘所賴陛下察臣樸忠哀臣孤立委曲
明辨特達保全非賴此恩豈至今日百生盡節九族捐
軀細自忖量亦難報塞豈可因祈便郡更冒殊榮載念
滿盈甚於焦灼是以露章車府布欸宸闈出綽已行雖
莫回於成命誓心至確固可質於明祇祇被寵私伏增

感泣此蓋陛下育材示惠圖舊敦風廣真廟之遺恩豐
壽藩之前愛力排羣議特簡聖衷將俯勸於事勞故靡
循於功次敢不竭心文札况庠米鹽益勵志於桑榆庶
酬恩於螢霧

謝授三司使表

臣某言伏奉制命特授臣依前行戶部尚書充三司使
加食邑五百戶食實封貳百戶散官勲如故者寵章非
次衍食有加載省愚冥實難堪克臣誠惶誠懼頓首頓

首伏念臣本由孤進仰會先朝掌右掖之贊書奉西清之密議真宗皇帝以臣父沒身報國最為忠義之家以臣制策登科粗識古今之體察臣持循少過知臣憂畏小心當陛下潛躍之初首東朝陪侍之選解衣推食最承逮下之私抱槩和銚日奉重暉之德適屬先皇違豫邪黨擅權六改郡符十更年籥但盡心於民政已絕望於朝廷伏遇尊位皇帝陛下出震承祧大明繼照猥思舊物遠錫飛毫出自宸衷擢階近輔當母后臨朝之際

是權臣惡直之時更互留身婉轉騰謗以漂山之巨力
害如線之寒蹤非仰賴於保全已坐成於靡碎又念全
齊舊壤連歲荐饑賊盜縱橫公私困竭臣猥分使指躬
按海壖晝夜兼行鬚鬢皓白未容殫於薄効已先著於
流言此際若非陛下斷自不疑察其非實力垂明辨幾
至傾危以茲重疊之恩未申分寸之報旋玷南都之寄
式當萬國之衝水陸往還是非藪澤上酬厚祿唯竭節
於公家曾忤柄臣已灰心於榮路止期退伏遠避猜嫌

豈謂陛下深惻上仁力排羣議念臣孤寒多難察臣介直無徒簡自聖衷擢司邦計破朝端之舊黨極天下之至公祇受以還感極以泣惟當恭勤夙夜策勵疲篤直剖肺肝少裨聽覽誓畢桑榆之景仰酬天地之仁

永興謝上表

臣某言伏奉制命特授臣奉寧軍節度使知永興軍府事駐泊馬步軍都總管涇原秦鳳路安撫使已於今月二十四日於本府上訖齋壇授受拜麗澤以惟優外間

臨戎望嚴宸而乍遠寄付尤重感懼增深中謝伏念臣
出自孤生誤登制舉既踰弱冠亟掌訓詞抱槩和鉛首
預東朝之選解衣推食獨承先帝之知但以賦性至愚
立身多難權臣共惡衆口爭非自揣單危分甘捐棄伏
遇尊位皇帝陛下睿明繼體仁愍象天軫黃屋之非心
記青宮之舊物擢參台鼎再貳樞衡恥巧宦以依人惟
朴忠而自竭仰蒙聖庇獲守近藩旋以東夏撫寧南郡
居守三腰郡組六換年華每懷襁被之行敢有賜環之

望豈謂陛下力排輿議召委計司爰當視事之初便主
摘山之議羣情向背密疏縱橫非上賴於辨明已立成
於禍患尋以禋燔下詔賞賚均恩為國盡忠雖明神之可
諒入朝見嫉鑒前世以堪驚嘗因賜對之間曾憑由衷
之懇候終考秩儻議遷除只祈都省之便安或預譯場
之潤色庶未從乎外補得時望於邇顏况臣自忝三司
始踰八月惟自勤於本局敢輒預於朝經實無片言偶
侵上位矧傷弓之最甚惟斂翼之是圖豈意羌戎妄為

狂孽不期公論誤及非才遽由端右之資擢授元戎之
寄臣出於將種粗讀兵鈐誓竭素心仰禱異遇其如邊
防務重京闕路遙動繫帷幄之指蹤方遂藩籬之固圉
敢祈睿哲更賜主張俾成橫草之功免累知臣之德

辭忠武軍節度使表

今月臣男都官員外郎安期到州伏蒙聖慈加食邑七
百戶實封二百戶餘如故者闕塞宿兵未殲於寇劇藩
垣進律遽改於旌麾自揣非功豈當虛受臣某中謝伏

念猥承人乏擢總戎昭再徙軍屯連更歲籩千金空費
曾無拙速之謀數級未聞方省不能之請甘從吏議以
避仕途敢謂恩章亟遷土宇虎符龍節韜部室以生輝
畫戟油幢擁和門而增壯然念兵氛尚盛外寇未攘田
井驚駭藩籬震蕩戎亭在望交湊於邊烽齎鉞空存未
塗於釁血豈宜爵號更及庸常此蓋伏遇皇帝陛下任
人不疑虛已求舊鎮以大體責其成功猖獗異謀固非一
日倉皇守備恐失萬全乞更賜於主張庶漸圖於翦滅

南標銅柱素尚於伏波西出玉關敢希於定遠臣無任
感天荷聖激切屏營之至

謝授忠武軍節度使表

臣某言伏奉詔書以臣所上表為蒙恩授忠武軍節度
使乞且守舊官所乞宜不允即斷來奏者西遐叛寇未
即靈誅南夏與區誤更寵爵恭膺詔版倍積覲顏中謝
臣聞漢疏國封由遠近為別唐制藩郡以雄望為差逮
於本朝參用前典量次舍之遐邇當功伐之重輕非服

大勞豈容妄受如臣者比從省禁出守邊屯雖迺志厲
懷霜力圖盡敵終以不知兵革空驚歲時訖無毫纖稱
報恩效衆訕以之空涌名論由是頓衰方乞避藏式蔽
蹇短豈謂遽頒制命進改使麾驟加衍食之榮橫竊景
風之拜此蓋伏遇皇帝陛下勤哀舊物深惻上仁念戍
役之甚艱愍關防之云遠特訪攸司之議曲推外徙之
恩責實靡聞無功增誚重念保邊之吏再歲以還或換
郡進資或書勞加秩兵衛職重止拜廉車勲戚地尊但

加留務臣獨涓剛日誕告外廷再刻印章重製旌節嚮
則卿省並授是以近而為榮今則邊瑣遞遷矧以遠而
為貴超踰儔匹度越等威不謂孤生冒此殊渥敢不根
心勵下畢力防秋冀效涓埃仰酬覆載

涇州謝上表

臣某言伏奉詔勅就差知涇州充涇原秦鳳路沿邊經
略安撫使兼涇原路駐泊馬步軍都總管已於今月二
十八日到任上訖祇奉選掄豈容勝任中謝伏念臣孤

寒多難愚拙自持劾官三十八年臨民十有一郡盡心
報國竭節首公未嘗自叙勤勞苟求進用亦不潛附朋
黨暗作階緣讒害至多顛危不一上則賴於聖世次則恃
於明神況已及於暮齡誓不移於前節伏遇尊位皇帝
陛下照齊日月道法乾坤辨臣子之忠邪察人情之真
偽念臣逮事先帝早奉東朝知臣靜退不爭察臣朴忠
有素向者一離樞府六換年華陛下召自別京俾司邦
計主摘山之議較射策之文定賞給之科設裡燭之備

動畏入朝之嫉始踰半歲之期陛下察臣孤危力垂保庇屬填邊瑣付以戎昭矧關輔之不寧洎邊防之少警臣兼程到職庶事創圖奏牘實繁蓋欲細聞於聖聽當官不顧實恐有誤於朝廷所賴陛下遠布宸聰力排羣議念臣不為身計務答主恩罷陝右之劇繁付回中之邊要詔函俯降使駢繼臨過賜撫存俾安驚惕惟臨涇之孤壘控西鄙之要津賊境不遙烽煙在望戎事久廢棲櫓未完敢不特創規模漸加綏葺又須陳請上浼穆

清乞倍賜於主張庶早平於猖獗皇天后土實鑒丹誠
永興再任謝上表

臣某言伏奉勅命就差充陝西路馬步軍都總管兼經
畧安撫沿邊招討等使知永興軍府事已於六月三十
日到任上訖全秦地重分陝寄隆私竊憂惟實難堪副
中謝臣聞忠臣結綬之始皆欲圖報於本朝義士執卷
之初盡期有濟於當世或則封陞徹警拳勇無自試之
塗或則貴要盈廷寒素絕干進之望鵷鷺困於羈縻琬

琰屈於煨塵眇觀舊編代有遺歎如臣者偶承人乏出
守軍屯蠢戾逋誅暄涼改序連營謂之無勇鄰城誚其
不能數級未辰何顏自處方祈退伏式避勞能豈謂伏
遇尊位皇帝陛下圖制國經召還樞輔盡以虎臣之職
付茲蟲篆之材俾攄轅下之勤得宣闌外之力上可以
建明策慮裨宗社之謀下可以進退否臧拯生靈之患
而況并護諸道總攝列城要駢組於闕中賓從動色陳
賜金於廡下營府相趨漸倚辦於官聯或有成於天幸

是則追芳往躅獲有竹帛之藏沒齒九泉免均糞壤之
朽敢不愈張膽勢益厲忠規戒警遂清儻擅三明之猛
恩章盡在豈徒七寶之嚴惟冀廟朝更寬轡策察持邊
之至重念善後之為難庶畢銖分上疇覆燾

謝授宣徽使表

臣某言今月某日男開封府推官都官員外郎安期到
府蒙恩賜臣制告勅牒各一道授臣依前官充宣徽南
院使者外廷敷告近禁升榮賞異及勞感深淪髓中謝

伏念臣性慚弦直識本榆瞑列仕籍者四十年貳柄臣者十五載一昨六周東夏式荷於賜環八月計廷未遑於溫席委朱墨而提劍褫紳珮以屬鞬急騫秦關旋驅隴道四遷歲景顧蓍寢以何嘗三徙軍屯恨脅疽之猶滯宿師有日斂策未辰豈圖不次之恩誤拜宣猷之寵入則奉承眷旨切近中樞出則統率戎昭總臨諸道銖分罔效名數太優難忘失旦之愆仄有再然之異此蓋伏遇尊位皇帝陛下記憐遭遇矜愍孤寒推東禁之舊

恩緣先朝之雅意念臣省闡並命止攀滿歲之郎邊瑣
例遷獨授遠藩之節天心不忍聖造曲成置於五府之
後陳俾參四貴之榮綴武非將表誠乏於雄稜形在目
中誓平於蠹戾庶階塵霧仰謝照臨

宣徽使乞換文資表

臣某言伏以文武設官所以審材用小大制祿所以辨
勤勞仰屬昌辰豈容冒處中謝伏念臣本由孤進幸會
先朝以直諒備史官以忠實供言職斥姦邪之黨比減

土木之修營以至外補江湖內遷藩郡剷除疾苦賑濟困窮累奉詔函繼褒吏課爰遇聖神出震聰哲宣慈靡替前恩遠頒宸翰旋由起奪入備論思力抗強臣獨持公議建明國制脩定刑章無一事曲佞宮闈無一言陰結朋援簾箔之內睿聽熟聞臺閣之間正人具悉而自出司東夏六換流年救海岱之饑生存之命億計平黃腫之盜安帖之城十餘爰就改於別都亦粗修於治迹以是景祐四祀進掌版圖寶元初年召計金穀摘山奏

格齊議論於參差備物成郊均賞賚於豐約適屬荒豪
背惠武旅乏人遽董戎旃出填邊瑣謀皆鑿空事必創
圖躬冒險艱常廢寢食若乃再臨鄧霸繼戍涇廊新斷
川涂肇營樓雉申嚴守備恥較力於干戈禁止交關謀
困賊於歲月圖上之策非一采擇之言亦多天地諒臣
盡忠吏民哀臣竭節但以數竒罕偶衆少難分不能飲
馬河源灌烽隴坻徒施固圉之力克謹邊防訖無汗馬
之勲能書竹帛逮終更而罷使叨善止以作藩勤遠至

勞積憂成疾是以懇祈內徙求復故棲雖叨中豫之遷
尚冒西陲之職露章屢上溫詔未從坐竊隆名又茲踰
歲惟經費之猶廣享厚祿以何安矧夫四貴之崇實均
三事之重當任英武入宣聖猷至乃六纛啟行萬錢賦
祿自非勇冠行陣功載旂常眇覲前聞未始虛授詎容
鉛槧之士久私玉帳之榮此者幸遇尊位皇帝陛下茂
育時材哀憐舊物責實羣后分治九圍伏乞念臣忝事
兩朝早更二府罄輸忠款恪奉官箴在公四十餘年夙

宵匪懈臨民一十五郡勤拙粗施冀以省闈前資計廷
舊職近司印綬兩鎮節旄改職文資俾安危懇誓竭當
官之效仰酬從欲之恩

再乞換文資表

臣某言伏奉詔書以臣所上表乞換文資宜不允者優
容過分震悸交懷中謝伏以四貴聯華禮次丞弼十連
作長寵冠公侯若乃擢從武人遷自勇爵固當永錫車
服遐佩印章其或素隸簡編蚤備臺閣偶緣戎警特假

將麾逮於終更理當罷使而况幅員至廣經費實繁亭
候雖虛租更尚闕在於供擬猶減舊常豈容具臣橫叨
大祿矧惟五府實總百工象樞極之運行繫宗社之輕
重端朝體國禮絕地尊詎宜州郡之寮妄廁巖廊之列
伏望尊位皇帝陛下矜憐衰老軫恤孤寒念一介之常
材有十載之榮遇錄四方奔走之效記兩朝夙夜之勤
采子方哀馬之言形漢宣求劍之意倍推恩於前奏俾
歸節於上臺幸及桑榆之陰再登鴈鷺之序儻或全於

危仆誓更竭於樸忠俯僂彷徨期於得請

蔡州到任謝上表

臣某言伏奉勅命就差臣判蔡州軍州事仍放朝辭取便路發赴本任臣已於今月二十七日到任上訖垂死餘息特許生還陪京近藩仍容臥治再造之賜九殞莫酬中謝伏念臣謬忝藝文妄干仕進先帝臨軒之際獨首於六科陛下出閣之初最先於諸傳每惟際會敢不矜修其如資性庸駑賦分蹇薄雖聖君哀其拙直而多

士嫉其愚狂出入兩朝當官者四十餘載周旋萬里典
民者一十五城夙夜在公固鬼神之可諒進退維谷實
孤子之無依嚮者纔入三司始踰數月屬河湟旅拒關
輔繹騷首得戎麾往填邊瑣肇謀器備創設規模經始
關防召募軍旅居則飲食無暇出則晝夜兼行本先固
圍之謀冀成長轡之馭其如衆議罕合物論易喧朝廷
切於平允搢紳惜其殫費所以未能出師隴首飲馬河
源盡阮材狼高築京觀以致對分將聞遠戍邊屯冒暑

中乾飲泉內冷藥石無效支體將墜惟力疾以臨戎誓捐生而報主式逢例罷就委藩條方敢自陳仰勾餘喘伏遇尊位皇帝陛下仁深念舊德務含生察三載之勤勞辨多言之虛實念臣年光老暮知臣蹤迹單危深慙上仁俾遷中豫京畿頗近醫診易逢倘或稍駐桑榆未填溝壑誓竭狗馬之效仰答天地之私

乞守舊官表

右臣昨再上章乞守舊官就移汝蔡養疾今蒙聖恩移

判蔡州已奉表上稱謝訖所有乞守舊官仍奉朝請者
三歲終更方求醫於便郡萬錢賦祿尚均寵於近司深
自憂惟不遑啟處伏念臣出於寒緒幸會昌期偶緣歲
月之勞叨塵文武之任向以小羗旅拒西鄙繹騷特換
戎旃往填邊瑣仰貪誤選曾不固辭謂天幸可以橫逢
謂戰功可以妄立歲時驚過誅納無聞仰荷寬恩止從
例罷爰以飲泉感疾伏枕踰時形容已枯支體將廢命
輕恩重既報國之未終福過災生固微榮之可畏以是

懇祈舊職望改近藩冀遂養頤或蘇朽瘁伏遇尊位皇
帝陛下曲矜老暮深愍勤勞中豫名區已更於郡組元
戎重器尚假於戎麾矧乃宣徽使名所以表率諸將節
制祿賜所以宴犒三軍當羗事之未平顧經費之滋廣
若以拓邊之寵猶私卧治之臣深屈至公豈容虛受望
並俞於前請庶克濟於餘年夢寤徬徨仰俟開可

謝詔書不允辭宣徽使表

臣某言今月十八日進奏院遞到詔書一道伏蒙聖慈

以臣三上章乞守舊官不允者愛下并容尚假無功之寵量能自媿彌增有覲之顏拜受以還跼蹐無地中謝伏念臣早緣薄技偶預辭林仰際休明寵重文雅以是沈迷篆刻况瘁簡編寤寐經營止於粉墨出入聞見不及弓刀豈意誤列將壇謬分閫寄三周歲律四改軍屯備歷艱危躬踐勞苦悵靡逢於天幸莫少振於軍聲罔養終更憂虞成疾薦叨藩衛之便獲遂藥石之求曲被矜憐已難勝負豈容更參四貴猶長十連襲多士廉退

之風索縣官經給之費以是屢罄肝膽乞上印章仰干
本朝安敢飾避伏遇尊位皇帝陛下記憐舊物勤卹外
徭不責犬馬之勞務推雨露之施特頒詔檢靡輟使麾
滲漉之恩誠為優絕支離之質何以遑寧敢不勵志米
鹽精心醫砭撫養貧細安聚荒饑冀策勵於疋殘用仰
壽於燾育

許州到任謝上表

臣某言伏奉勅命差赴本任已於今月二十五日上訖

出自保全伏增感泣中謝竊念臣人品駕下世緒寒微
事國四十餘年臨民十有五郡言行無取政化靡聞空
度歲時動成嗤鄙策勵之心徒切頑闇之稟莫移昨以
守塞終更瀕涯養疾求還使節未奉俞音蒙降侍醫僅
存殘喘日慙厚祿內訟無功安敢萌心更欲希進不圖
驛傳猥賜詔函職尚備於藩侯地又遙於邊瑣敢稽召
節預述無能爰夙駕以載驅將晨趨而滙款有煩公議
合寘簡書一則臣嘗假戎麾首圖羌事三周歲籥四改

軍屯惟竭慮以保邊靡出師而盡敵一則臣久從外補
罕遇時英或但採於風聞未深諒於衷悃分甘棄置式
儆庸愚伏遇尊位皇帝陛下察臣樸忠念臣孤苦以遽
申於避遜况匪自於干祈力辨羣言聽還本任望宸居
而至邇瞻幄座以無由傷弦之感自多淪髓之恩難叙
都門迴首雨涕交頤敢不深務省循永懷兢畏更勵當
官之節上酬衰老之仁

亳州到任謝上表

臣某言蒙恩就差知亳州軍州事今月十四日到任上
訖辭繁就逸冀保於阡危竭志服勞未疇於再造深自
惟忖詎敢遑寧中謝伏念臣少失父兄長無師友守簡
編之陳迹昧臺閣之遠猷謂委分可以率天真謂直躬
可以成世務獨任蹇短動至顛躋一昨罷使洛郊臥疾
蒲阪懇祈中豫就訪良醫幸殘喘之偶存實榮望之都
絕不圖星使忽降芝函敢稽就日之行仰廢出綸之旨
豈謂都門始入遽隔中參詔字未乾亟還本任矧惟舊


許實首近藩控亭傳之要途多衣纓之貴胄漂流之際
間隙易乘在渙汗之尚還何飛條之難集式屬近臣致
政便郡瀕淮老物可憎儻知慙而匿迹來寵將授或觀
過以回心爰布懇私上祈開可伏遇尊位皇帝陛下哀
矜恤下仁愍好生察羣議之忠邪照物情之真偽幽枉
斯達務昭責實之明窮蹙可憐特徇換州之請載惟渦
渙之下適當湟潦之餘敢不修謹米鹽繕完圖籍勵傷
摧之晚節蘇震悖之羈魂永罄涓誠仰禱大庇

河中府到任謝上表

臣某言伏奉勅命就差判河中軍府事今月二十日到任上訖十月期歸將終遠戍三年更盡獲改列城仰荷保全敢忘循省中謝伏念臣本階平進逮事兩朝攀仕塗者四十春陪時政者十五祀大勞雖闕薄效粗陳嚮者六載徂東班條蓋久八月主計座席未遑亟自省闡出分將鉞軍屯屢改年篇四遷徒厯險艱未殲蠹戾又以謀皆鑿空事或創圖利遠效遲望輕人嫉多言空涌

沮議叢興每下列章尚寬薄責彌深策厲冀塞矜容由
是寢食外虧精爽中耗毒炭熏目雙瞳斗昏邊風切肌
兩臂將廢懼戎謀之闕間常力疾以治戎夙夜在勤人
神可諒矧惟閫外之得失實繫天下之安危一毫或差
九殞焉贖儻便文而自衛固罔上以非忠况復功名良
繫運命援臂不耦必難立於乃勳虎頸飛行將有待於來
者是以常布危欵冀解劇權伏遇尊位皇帝陛下從欲
象天寶慈體道卹繇戍之憂苦察臣下之艱辛因分道

以更張俾班條而得請穿楊善止雖謝於前勞有杖勤
歸差安於衆聽儻逢鍼艾之益稍扶蒲柳之衰誓屬右
橐重趨絕塞庶成來效仰答大恩



大莊集卷六

欽定四庫全書

集部

文莊集卷七至九

詳校官監察御史_臣李陽楓

檢討_臣何思鈞覆勘

謄錄副貢生_臣杭光晉

謄錄監生_臣任溥

謄錄監生_臣黃鐘

欽定四庫全書

文莊集卷七

宋 夏竦 撰

表

辭資政殿大學士表

臣某言某月日三班奉職龐顯到州伏蒙聖慈賜臣勅牒一道官誥一道特授臣依前本官充資政殿大學士及准中書劄子奉聖旨賜臣對衣金帶鞍轡馬恩惟圖舊詎可妄要賞異及勞豈容虛受虔瞻出綍愧極無顏

臣某誠惶誠懼頓首頓首伏念臣本以孤生誤攀雋軌
頃由端右出總戎機儒服治兵易騰於衆誹丹誠許國
惟誓於明祇而繼戍涇廊嘗嬰疾癘晝則力疾備寇夜
則丸艾灼膚矧夫義重於生固知死且不朽委形骸於
馬革等性命於鴻毛初無片言曾句餘喘終更三歲罷
守一麾視事踰時中乾卧病累旬不起九殞是濱况迺
萍津計居內地別無戎羌之禦遂祈汝蔡之遷蒙降侍
醫奔抃沈瘵儻未鄰於萬鬼誓復守於三邊昨茲春夏

之交獲逢鍼石之益尚聞外警臨遣輔臣爰拜露章請
陪邊候但以于蕃之僻左未知異俗之懷來遽煩恩私
過極褒寵伏見朝廷待下賞勸從宜臣子立身出處有
禮病不任事則請告營醫疾既有瘳則首公復業顧無
可錄是惟厥常又念前春常膺詔召官有擁旄之重禮
無俟駕之行不敢豫拜封章力避賢路洎還舊許方悞
顓蒙職巨寡謀累國傷體尚蒙寬宥特遣簡書而況今
者竊處近城宴安自逸求備邊瑣跬步未前儻不懇辭

更貪異渥固當自訟何待人言此者伏遇尊位皇帝陛下躬奮乾剛布昭天律濬發明詔洞判忠邪登用正人眈分枉直陶唐之聖讒說虞舜之察邇言臣方敢備列危衷乞還成命庶獲全於晚節更免遂於前非詎敢飾情自昧丹臆

謝授資政殿大學士表

臣某言今月十二日准樞密院馬遞到詔書一道以臣所上表為曾乞邊任蒙除資政殿大學士及有恩賜不

敢當受陳乞宜不允者人言可畏實駭虛弦天聽蓋高
靡收渙汗載揆官閥固措心顏臣某中謝洪惟先朝經
始內殿敞訪對之地謹備問之員擇人甚艱其職多闕
臣齒髮空悴績效靡章遭值聖時叨竊榮祿出入宰屬
塵點皇僚豈宜無功更冒清選而況向者邊書挿羽邏
騎具裝秦隴威兵鄴雍謀帥本朝以年輩最舊勤拙粗
施擢於計廷付以戎警力小負重自見甚明就約辭危
臣節安在內惟策勵誓首險艱四改師屯三周歲籥羌

事圖上必深料於安危王師務全敢挑取於功譽終更
罷成感疾營醫方勾近城以捄沈瘵不圖詔檢促覲宸
居權輿識工據崗敢辨李長辭銳飾貌難申省咎歸塗
逃形近邑監司按其粟錯都鄙陳於平條詩會餘蚺之
文簡凝含醕之墨寓趾泮水之罇側身攢羽之衝分沈
死灰趣畢殘喘伏遇尊位皇帝陛下宣精百度觀象九
乾剛健博臨高明廣照深惟累洽之盛宜杜私黨之萌
或宗社阻憑干於衆憤則郊廟對越契於神歡中發

芝函誕告鵷序開悛止之路戒澆競之風俾棄私於所
天當首公於王室三辰增煥六合頓清人祇阜安道路
鼓舞復我釀化曾不崇朝臣方敢自上疾瘳請還邊候
亟瞻出綽之訓翻詒躍冶之羞况夫媿汗未乾悸膽猶
破苟遂非於覆轍必騰誚於刑章爰叙憂兢祈寢褒進
仰承日月之鑒俯哀螻蟻之心延登正人訪迷公論諒
臣孤立察臣前勞觀靡監之篇采勤歸之義詔馭幸之
柄圖勸後之恩敷諭至明拜授斯寵忠臣共慰旅魄交

寧期報德於萬分誓捐生於百世感極惟涕陳叙罔周
河南府到任謝上表

臣某言伏奉制命差判河南府兼西京留守司公事已
於今月九日到任訖偏陪五府歷守三都逢辰之榮曠
古無並臣中謝伏念臣人品至下門緒素寒孤苦一生
述遭萬狀歲月邁如郵置筋力困於泥塗謀已弗臧舉
世詒誚往歲召於中豫入長近樞昧遜讓於時賢實格
廢於成命間者起自渦曲往帥晉陽嘗面對於邇顏乞

永從於外補懼以危迹復玷清時不圖再歲之間忽補
鼎司之闕遽遷右府逮越周星掌虎旅之伍符宣龍韜
之聖畧雖矍鑠而自勉終遭坎以難工朝多正人日有
公議煩黃屋之掩蔽辱丹宸之辨明備位無顏謝負何
地而况鉅賢讓爵哲士辭榮晏然自安亦不知避尚賴
伏遇尊位皇帝陛下察臣闇懦止是顓愚慙臣憂勞別
無他累力排時論敷告外廷進秩師垣均勞洛邑俾其
休逸保乃衰殘息偃無營冀漸生於髀肉責望不及將

永脫於風波誓輸樂職之勤仰酬衰老之惠瞻望闕廷
臣無任戴天荷聖激切屏營之至謹奉表稱謝以聞臣
某誠榮誠感頓首頓首

孟州到任謝上表

臣某言伏奉勅命赴孟州本任於今月二十一日上訖
班寬大之詔存拊吏民歌中和之詩祇見叅佐勉厲衰
朽少謝矜憐臣某中謝伏念臣蚤以諸生幸逢清世勤
勞四紀險易一生筋力困於泥塗髀骨消於亭隧迄無

纖效紀在本朝昨以竊位樞廷均勞洛宅寵冠九域地
首三都太高則危暴長將折而况驛傳至遠迎勞尤艱
屬本鎮之缺官爰露章而布款伏遇尊位皇帝陛下寶
慈體道求舊敦仁老馬力殫靡忘前效傷禽膽破知避
虛弦特允三城之求俾紓四體之責然而據河山之要
控魏晉之衝古多重兵代委名將方今租庾至闕閭里
尤虛浮梁有蹇蹇之役長隄乏為捷之備生以馭福實
銜佚老之恩職思其憂敢急匪躬之節唯期夙夜仰答

照臨

辭兼侍中表

臣某言今月十八日姪女壻權國子監主簿高直溫到西京伏蒙聖慈賜臣制命官誥特授臣依前檢校太師兼侍中仍加食邑實封者擁旄本鎮已俯遂於厥誠參乘東臺實迴踰於初望聞命震恐啓處不遑臣某中謝伏念臣近以衰殘迫於迎勞求還近使之任止避曠殆之愆向或所鎮並邊郡將無闕稍涉毫芒之幸敢萌遷

徙之求況在前章備陳丹款實無一字少飾片言其或
外叙衰殘內懷希覲有覲顏面更睹士流設道典刑當
有陰罰不圖聖眷遽錫制恩若以念舊均慈則臣累官
已重若以疇勞第賞則臣宣力無成伏况朝廷要官挑
取者難久天下公議巧避者愈彰儻詔有隧之深譏將
累挂車之善止此者伏遇尊位皇帝陛下慎徽百度精
汰庶官賞必計功祿無廢德矧迺納言之重當圖汗馬
之勞豈容蒲柳之衰更竊金貂之賜伏望陛下哀臣介

拙慙臣憂危特寢異恩聽守前職垂儲儲之髮庶無責
於時賢伐坎坎之輪免有妨於來寵誓堅廉讓之節仰
躋覆露之仁

謝授兼侍中表

臣某言今月二十二日伏奉詔命以臣所上表蒙恩特
授檢校太師兼侍中乞守舊官不許辭者芝函睿札諭
旨於十行蟬冕要官升華於一品顧茲非據何但若驚
臣某中謝伏以參乘東臺納言內幄訪延密政出納大

猷制爵至崇兼官尤重或以尊懿戚或以馭戰功近世
儒臣罕得超授如臣者材品至下門地素寒偶階片文
仰會先聖冠制策之親選預東禁之精求夜寐夙興更
中外者四紀興利除害貫險易而一心若乃賑漢右餓
殍四十五萬餘口屏江西巫覡一千三百餘家屢承綸
綍之褒頗首循良之寄伏遇尊位皇帝陛下重暉繼照
求舊推恩擢參垂箔之近班實罄戴君之亮節洎乃海
隅聚寇責以救寧關內治兵委之經畫偶無愆素粗得

全師聖念疇勞召長樞府又以并汾陟滿起付戎輶趙
魏卒驕就更邊戍載嚴軍律稍契前籌宸慈記功命亞
台席終以久供外役罕接雋游靡卹寸長務責全德一
則以聚羌遠塞是臣盡敵無能一則以雨土中都乃臣
治邊所召乞放還於舊任洎追返於渙恩上賴陛下諒
臣樸忠愍臣窮蹇力排羣議特遣簡書斷自穆清裁於
宥密傷推自悼矍鑠何堪尋蒙進秩師垣均勞洛宅而
又密塗交會右族威強寘法未能廢刑豈敢至有誣其

加筮構以凭輿復賴保全為臣辯雪再念臣本鎮甚邇
郡將未除爰叙艱危求換繁劇得請之日被賜已深如
脫樊籠頓解韁鎖豈謂洊頒明制誤賞無功補外常儀
靡諧於三讓發中溫詔促預於七車敢不策勵羸軀矜
持晚節畢桑榆之暮齒答穹厚之鴻私

謝男安期加職表

臣某言伏蒙聖慈特授臣男安期龍圖閣直學士知渭
州者公朝誤賞私室叨榮言念衰遲豈勝感慰臣某中

謝伏念臣族本寒緒世無顯官闕食米之舊封墜滿羸
之前訓屬公台慎選之日實縉紳精汰之辰黃髮何堪
視維師之隆器賤息無算遷內閣之近僚繼承優假之
私豈殊前後之拜此蓋伏遇尊位皇帝陛下睿明稽古
信厚記功以為造武公之衣周王所以旌善職封降戎
之檄漢帝所以顯忠臣斷自上心疏茲寵爵賞延於世
既橫被於恩榮義重於生誓共期於報塞

文莊集卷七